

# Dahoam is Dahoam

Dahoam is Dahoam!  
Wißts wia i des moan  
und wos i damit sogn mecht?  
Im Fernsehn do is ja ned echt!

Und do, de drei Wörta gebn an Sinn,  
a Bekenntnis liegt im Ausspruch drinn:  
Hoamatliab, Geborgnheit,  
mit sich zfriedn volla Freid!

A jeds vo uns hod do des Gfuih,  
dahoam z'sei des bedeut oam vui!  
Freili, andaswo is aa recht schee,  
drum dean mia gern in Urlaub geh.

Tapetnwechsl braucht ma hoid,  
weils oam ja andaswo aa gfoid.  
Meistns aba saan mia froh,  
kemman dahoam mia wieda o!

Ma fuid se woih im eigna Reich,  
hod seine Freind in dem Bereich.  
De gleiche Sprach, vasteht de Leit,  
des ganze Umfaid macht oam Freid.

De Berg, da See, Faida und Woid,  
de Jahreszeitn, moi hoäß, moi koid,  
allgemein gsogt, de Natur,  
in seina Vuifoit, Schönheit pur!

Dahoam findt ma se oafach zrecht,  
ma duad und loßt wos ma gern mecht!  
's Geheimnis is des olles zamm:  
Dahoam is Dahoam, wias mia gern ham!

Ernst Reiter